

1TI -

1 Timote

Təntən sagı tə, Polə nə púpúní v pa

Timote

nə

Timote təntən sagı tə yuu wa sugu

Lìù tə, v nə púpúní sagı ku tə

Ku yı *tuntunu Polə nə púpúní ku. Máná tə wa, v nə púpúní ku, də v yı v wulə bán diè wa Romə nə.

Lìù tə nə, Polə nə púpúní

Sagı ku tə yı təntən sagı tə, Polə nə púpúní v pa Timote nə. Timote nyına tà *Zwifə, v nuu ga yı Zwifə. U jigə *Kərisə lìù, v ga yı Polə karbiu. Timote jigə Polə twaduən tə wa lìù don, v yà nə swə zənzən. Yìèn yà nə wulə Kərisə lià púlé tə wa, Polə yàá tun wá lá nə, sə v va v ywàń tə yuu. Polə pun wá nii, sə v ya Efezə nə, v dàn Kərisə lià tə jìàn də v kàrì ba.

Sagı tə wa sugu

Efezə *Kərisə lià tə yı ba tə wulə ba tanı ba tiàn. Yá Kərisə lià duən də wulə ba kàrì kunkun yìèn. Polə púpúní ku, v ma bırı Timote nə kwìè tə, v nə me, sə v pa Efezə Kərisə lià tə də ba yáá tiàn tə nə.

Polə pìà v bırı Timote də, v me, sə v ja cígá kàrà tə v waa con. U me, sə v twá Yu sagı tə wa sùràn tə nii nə, ndə ku nə me nətı. U me, sə v tun suywánjú tə tütùnán tə wuuu, v dàn ká yá. U me, sə v kwen Kərisə lià púlí tə, v kə cwəŋə nə, v ga kúrí yáá tiàn nəzəŋə.

1

Polə jùnnì Timote

(Titə 1.1-4)

¹ À mù Polə yì Zwezi-**Kərisə* **tuntunu*. À mù nə púpúní sagi ku tə. Yu jon nəba nə cuna wa. Zwezi-Kərisə də pɪn nə jə yala. Yá ʋ mù nə pɪn nii, sə à ya ba tuntunu. ² À púpúní sagi ku tə, à pɪn n mù Timote nə, n nə yì ndə à bìú nə cígá cígá, n nə kəni n waa Zwezi nə tə yiri. Nə nyina Yu də nə **Yuu-Tiu* Zwezi-Kərisə nə wá fwa pubwanu n yira. Ba mù nə wá dəri n yinəgə zənzən, ba ga pa mú bican sié.

Á cia á tiàn nə də kunkun karnyina-ba tə

(1 Timote 6.3-5, Titə 3.9, Galasi tiàn 3.10-12, 19-24)

³ Máná tə, à nə vəli Masedwanə nagwanaa, à pɪn mú kwìè, sə n yà Efezə nə, n cì lià duən nə, ba dàn ká buri kunkun kàrì. ⁴ Ku mù təntə kwa nə, sə n tə cì ba nə, ba dàn ká jələ tə yomanan təntə mancun tətə. Tə yì yìèn tə, tə nə ba dèñ jə. Tə duən də ga yì ba nɪbara-ba tə yìèn tə twara, tə nə wàrì tə gəlì tə zwè. Tə mù yìèn təntə yà tútùná cici nə, tə yàá zìn, tə ga ba saɲa, sə Yu fira tə tun də ba. Ba wàá Yu fira təntə ba lwarì, də ba nə ken ba waa Zwezi nə. ⁵ Yoo tə yiri, n nə mɛ, sə n swìn ku nətu tə ba con, ku mù nə yì, sə ba wàní ba sóní duən. Ba sonu təntə mɛ, sə ku ya də bican nəpon, ku nə ba pubunkukwɪnan jə, sə ku pa ba nə kəni ba waa Zwezi nə tə ya cígá cígá. ⁶ Lià duən jén ba tiàn, ba kùù ba tə yìèn təntə fwa. Yá ba nə jén tə dàn nə pɪn, ba jə tútùná, tə nə ba nywarì jə. ⁷ Ba pìà, sə ba ya Yu **nii* tə, ʋ nə pɪn **Moyizə* nə dèñ, ba buri lià nə. Yá ba ga yəri ba tətə sùràn tə dèñ, ba nə swìn. Ba yəri yìèn tə dèñ, ba nə kàrì tə yoo də diàn, ndə ba yèé tə.

⁸ Nə yèé də, Yu nii tə zìèn, də ba nə ja ku ba tuɲa, ndə ku nə mɛ nətu.

⁹ Ku mù yiri, ba me, sə ba lwarɪ də, Yu nii tə tà v pɪn lià tə yiri, ba nə yi cígá tián. Á nənə ləzwənyirə tə, Yu nə pɪn v nii tə ba yiri: Ku mù nə yi wulɒnyina, də lià tə, ba nə ba Yu nii zìlí, də lià tə, ba yáá nə tɛlə də Yu, də cuna lià. Yu pɪn v nii tə lià tə yiri, ba nə ba Yu yìèn tə zìlí, də ba tə, ba nə zunɪ v mù Yu cwənə tə, də ba tə yiri, ba nə gwi ba ninə də ba nyina, də lagura yiri. ¹⁰ Yu pɪn v nii tə lià tə yiri, ba nə pèní duən vɛɛ vɛɛ, də bara tə yiri, ba nə ba kan pìà, ba ga pìà bara duən, ba ma fwa ba kana, də ba tə yiri, ba nə janɪ lià ba yoli. Yu pɪn v nii tə lià tə mama yiri, ba nə yi kunkuna, də ba tə yiri, ba nə swìn kunkun yìèn. Yu pɪn v nii tə lià tə mama yiri, ba nə tuɲa yìèn tə, tə nə ziga v cígá kàrà tə nə. ¹¹ Kàrà tɛntə də suywánú tə yi nədu. Suywánú tɛntə nan Yu con. Yá ku mù nə biri v pupwən tə, də v dun tə. Yá Yu tɛntə nə ken suywánú tɛntə yoo à jìàn wa, sə à swìn ku à biri.

Yu pubwanu tə, v nə fwa Polə yira

(Tutvnan 26.9-20, 1 Timote 6.12, 20-21, 2 Timote 2.15-18)

¹² À kəni nə *Yuu-Tiu Zwezi-*Kərisə lèè. U bún də, à yi liù tə, v nə wàá à yuu wa v jələ, sə à tun v tutuɲɪ tə də pùé nədu, v ma kúrí nə, sə à tun ku. U dān pɪn nə diàn, sə à ma tun ku tutuɲɪ tɛntə. ¹³ Máná don yin lá, à nə twɪn v mù Zwezi tɛntə. À fifɪn v Kərisə lià tə, də à kəni càn ba nə. Də ku nətu tə mama, à yinəgə zənzən jun wá. Ləyəri yà nə pɪn, à fwa ku nətu tə, à ga wà cígá pɪn Zwezi nə də. ¹⁴ Yá nə Yuu-Tiu dān fwa pubwanu à yira, ku nə dáá zənzən, ku ja lɛ. À kəni à waa v nə wuuu, à dān ga jə Zwezi-Kərisə sonu tə. ¹⁵ Ku tə à nə pìà, sə à swìn yəbə, ku ya sugu tə, ku nə yi cígá. Lià tə mama nə me, sə ba sè ku. Zwezi-Kərisə twi tia yuu, sə v jon lià ba cuna wa. À mù ga nə yi ba yáá tíú, à cuna nə dwə ba, v nə jon. ¹⁶ Yá Zwezi-Kərisə dān dəri à mù liù tə, à cuna nə dáá tə doni ba duən, tə yinəgə zənzən. Ku mù nə pɪn, v twá də nə, sə v ma biri v pínú tə nə yi nətu. U biri

ku, sə v ma dân lià tə, ba nə wá kə ba waa v nə, jìàn, sə ba ga na mu tə, ku nə ba zwè v con.

¹⁷ À pià, sə lià tə pa dun Yu nə, ba ga bu v nə, máná də máná, ku nə ba zwè. Yu nə yi piú tə, v pàrì tə nə ba zwè, abada. U mù nə ya Yu tə, v nə wulə máná mama wuuu, yii nə wàrì wá ku nì, v ga yi v cici də. Amuna!

¹⁸ À biú Timote, à pià, sə à swìn n con, sə n tun n pa Yu nə, ndə Yu nii *sùsùnà tə dun nə swìn n yoo nətə. N dân pií n líí Yu nii sùsùnà tə sùràn təntə yoo, sə n tun Yu tutuŋi tə zəni zəni, ndə n nə pià, sə n jan jaŋa, ka nə ziən. ¹⁹ N jaŋa təntə wa, n tə mɛ, sə n kə n waa Zwezi nə wuuu. N pubuŋa tə ga wà mɛ, sə ka ya pubunkukwɔn. Lià duən dugu ka ja pubunzəŋə təntə yoo vən nə. Ku mù nə pɔn, ba yà dí yáá, ba kə ba waa Zwezi nə. Yá ku nə yí yáá, ba kúù ba ba waa kəni Zwezi nə. ²⁰ Ku mù ləzwənyirə təntə wa, lià duən nə yi Yimene də Aləkəzandərə. À ken ba mù lià təntə *Sitana jìàn wa, sə ba ma lwarì swian, ba kúù dân ká twɔn Yu.

2

Nətə tə, ba nə jùnì Yu

(Ebərə-ba 2.9)

¹ Təntən yoo tə à nə kwè, sə ba fwa, ku mù nə yi, sə *Kərisə lià tə jùn Yu, sə ba lòrì Yu, sə ba kə Yu lèè, lià tə mama yuu yiri. ² Ba lòrì Yu, ba pa pègá tə nə, sə ba lòrì Yu, ba pa lià tə nə, ba nə ywàŋá ba luv tə yuu, sə ba luv tə wàní ku zùrì, sə sié ya ku wa. Ku nətə wá san, sə nə wàní nə zìlí Yu, nə ga twá wá zəni. ³ Mə ku mù yoo təntə nə ywán, ku ga ziən, ku pa Yu nə, v nə jon nəba nə cuna wa. ⁴ Mə v mù nə pià, sə v jon lià tə mama ba cuna wa. Ku nə sùrí lá, sə v pa ba lwarì v cígá tə. ⁵ Yu yi nədu, yá ləzwəndua nə wulə v mù Yu də ləzoni pwéré wa. Ku liù təntə nə yi Zwezi-*Kərisə. ⁶ U mù nə pɔn v tiàn, sə v ti ləzoni tə mama yuu yiri, sə v ma jon ba, ba cuna wa.

Ku mù yoo tǝntǝ nǝ bɪɾɪ, ku mǎŋǎ tǝ tǝtǝ wǎ, dǝ Yu pǐǎ, sǝ v jon lǝzoni mama. ⁷ Mǝ ku mù yɪɾɪ nǝ, Yu tún nǝ, sǝ à ya v *tuntunu, à swɪn v sugu tǝ. À mù nǝ mɛ, sǝ à gwin Yu sugu tǝ dǝn à bɪɾɪ liǎ tǝ nǝ, ba nǝ tà *Zwifǝ-ba, sǝ ba kǝ ba waa Zwezi nǝ, sǝ à bɪɾɪ ba cíǵǎ tǝ dǝ. À bɪɾɪ ku cíǵǎ tǝntǝ liǎ tǝ nǝ, ba nǝ tà Zwifǝ-ba. Ku tà kunkun nǝ à kuni, ku ya cíǵǎ nǝ à swɪn.

Bara dǝ kana nǝ mɛ, sǝ ba ya nǝtv Kǝrisǝ liǎ jǝré wǎ

(1 Piyerǝ 3.1-6, 1 Korǝntǝ tǐǎn 14.34-35, Titǝ 2.3-5)

⁸ À dǎn pǐǎ, sǝ bwǎlí mama nǝ, sǝ bara tǝ jun Yu. Ba nǝ zɪn ba jǐǎn yu nǝ, sǝ ba ma jun Yu, ba mɛ, sǝ ba ya liǎ tǝ, Yu nǝ ti ba. Luǵǎ wǎ mɛ, sǝ tǝ ya ba bɪcanɪ wǎ. Tútúnǎ dǝ wǎ mɛ, sǝ tǝ ya ba pubuǵǎ wǎ. ⁹ À swǝ, sǝ kana tǝ dǝ zu ganǎn, ndǝ kan nǝ mɛ, sǝ v zu v gǎnǝ nǝtv. Ba dǎn kǎ zu gǎnǎn tǝ, tǝ nǝ ba ziǝn dǝ ba. Tǝ wǎ mɛ, sǝ tǝ ya jɪǵǝ tǐǎn ganǎn. Ba dǎn kǎ pan yun tǝ yiri nǝ yɪ jɪǵǝ tǐǎn nǝ panɪ. Ba dǎn kǎ nǎn ba tǐǎn dǝ sǐǎn bɪǎn zǎnǎn, nǝ à yǝǝ gǎnǎn tǝ, tǝ kwǝnǝ nǝ dǎǎ zǝnzǝn. ¹⁰ Ba bwanwiǝn dǎn mɛ, sǝ tǝ ya ka tun zǝni. Ku mù nǝ mɛ dǝ kana tǝ, ba nǝ swɪn dǝ, ba mù zilí Yu. ¹¹ Kǎrà tǝ mǎŋǎ wǎ, kana tǝ mɛ, sǝ ba cuǵu kǎrà tǝ sǎnbwen, sǝ ba sǝ kǎrà tǝ nii. ¹² À ba nii pɪn kan nǝ, sǝ v kǎrà bara tǝ, nǝ à yǝǝ, sǝ v ja dǐǎn ba yuu wǎ. Kana tǝ mɛ, sǝ ba pú ba níǝ, ba jǝn sǎnbwen. ¹³ Ku dǝn nǝ yɪ Yu tǝntǝn, v fwa Adamǝ. Ku kwa nǝ, v fwa Evǝ. ¹⁴ Yǎ ku tà Adamǝ nǝ, *Sitana gɪǵarɪ, ku yɪ kan tǝ nǝ, v gɪǵarɪ. Ku nǝtv dǎn pǐǎ ku bɪɾɪ dǝ, kan nǝ vɪǵǎ Yu nii tǝ. ¹⁵ Yǎ dǝ ku nǝtv mama, Yu wǎ jon kan v cuna wǎ, v nǝ lɪɾɪ bɪǎ tǝ yɪɾɪ. Yu wǎ jon wǎ, dǝ v nǝ kǝni v waa Zwezi nǝ wuuu, dǝ v nǝ swǝ liǎ, dǝ v nǝ twǎ Yu nǝ zǝni, dǝ v nǝ jǝ v tǐǎn zǝni.

3

Kǝrisǝ liǎ púlí yuu tǐǎn

(Titǝ 1.5-9, 1 Piyerǝ 5.1-4)

¹ Sugu ku tɛ̀, à nɛ̀ pià à swìn, ku ya cígá. Liù tɛ̀, v nɛ̀ pià, sɛ̀ v ya *Kərisə lià púlí yáá tián yuu tíú, ku tíú pià tutunzəŋu. ² Kərisə lià púlí yáá tián yuu tíú wà mɛ́, sɛ̀ v ja yokukwɪnan, ba nɛ̀ wá caga v nii nɛ̀ tɛ̀ yiri. U mɛ́, sɛ̀ v ya kan nədu barɪ. U mɛ́, sɛ̀ v ya liù tɛ̀, v nɛ̀ buŋa zəni. U mɛ́, sɛ̀ v ya liù tɛ̀, v nɛ̀ tuŋa yièn tɛ̀, ndə ku nɛ̀ mɛ́, sɛ̀ tɛ̀ tun nətu. U mɛ́, sɛ̀ v ya liù tɛ̀, v nɛ̀ sɛ̀ v joŋə vərə zəni, v pa ba zurɪ v diè wa. U mɛ́, sɛ̀ v ya liù tɛ̀, v nɛ̀ wàá lià v kàrì zəni. ³ U wà mɛ́, sɛ̀ v nywin swana zənzən, v bubuni. Nə à yèé, sɛ̀ v ya jariduru. U dān mɛ́, sɛ̀ v ya liù tɛ̀, v nɛ̀ yi búbàbà. U wà mɛ́, sɛ̀ v ya tutunyan. Nə à yèé, sɛ̀ v sóní səbiu. ⁴ U mɛ́, sɛ̀ v dí yáá v kwɛn v tətə diè tɛ̀ zəni, sɛ̀ v bia tɛ̀ wànɪ ba sɛ̀ v nii, ba ga zilí v tətə cígá cígá. ⁵ Də liù nɛ̀ wàri v tətə diè v kwɛn, nətə nɛ̀ v wá fwa, v ma kwɛn Kərisə lià púlí tɛ̀ mù? ⁶ Á nɛ̀ pià, sɛ̀ á kúrì Kərisə lià púlí yáá tián yuu tíú, á dànà ká kúrì liù tɛ̀, v nɛ̀ ken v waa Zwezi nɛ̀ dura. Á nɛ̀ kúrì liù nətu, v wá fwa fwíə, yá Yu bura tɛ̀ wá ja wá, ndə ka nɛ̀ jun *Sitana nətu. ⁷ Kərisə lià púlí yáá tián yuu tíú mɛ́, sɛ̀ lià tɛ̀, ba nɛ̀ tà Kərisə lià, də tətə swìn v yozəŋə yoo. Ku nɛ̀ tà nətu, ku wàá ku pin ba goni wá. Yá cavira wá zu wá, Sitana ga twá ku nɛ̀, v ma ja wá.

Kərisə là púlí tùtùná yoo

(Tutvnan 6.1-6, 1 Korentə tián 4.2)

⁸ *Kərisə lià púlí tùtùná də mə, sə ba ya lià tə, lià nə mə, sə ba zílí ba. Ba ga mə, sə ba ya cígá cígá lià. Ba wà mə, sə ba nyun swana zənzən, ba ga wà mə, sə ba twá yokukwɪnan nə, ba ma na səbiu. ⁹ Ba mə, sə ba pa cígá sugu tə nə, ku nə sègè, Yu nə buri ba, də pubuŋa tə, ka ziən. ¹⁰ Á nə pià, sə á kúrí Kərisə lià púlí tùtùná, ku mə, sə á dí yáá dédén ba, á na ku tə, ba nə yɪ. Də ba nə ba yokukwɪnan jə, lià nə wá swìn tə yoo, sə á dàń zɪgɪ lá, á kə ba Kərisə lià púlí tùtùnán tə wa. ¹¹ Kərisə lià púlí tùtùná tə kana mə, sə ba ya kana tə, lià nə zílí ba. Ba wà mə, sə ba ya lià tə, ba nə swìn yolwana, ba

pun làa nà. Ba mɛ, sà ba ya kana tɛ, ba nà buɲa zəni. Ba mɛ, sà ba ya kana tɛ, ba nà yɪ pùó nɛdu tián yoo mama wa. ¹² Kərisə làa púlí tutunu mɛ, sà u ya kan nɛdu bari. U mɛ, sà u wàní u tətə bia tɛ, də u tətə diè tɛ u kə cwəŋə nà zəni. ¹³ Kərisə làa púlí tùtùnà tɛ, ba nà tuɲa zəni, ba wá na dun bwálí. Ba ga wá wàní ba swìn Zwezi-Kərisə sugu tɛ, də ba cígá mama, ba nà kəni ba waa u nà tɛ yiri.

Yoo nəfaru, ku nə sègè

(Efɛzə tián 2.19-22, Zwan 1.1, 14, Romə tián 1.4, 16.25-26)

¹⁴ À púpúní sagi ku tɛ n nà, à ga jə yala də, à wá bà à na mú, mánjá mancun wa. ¹⁵ Də à nà dán à wà twi, sà n twá sagi ku tɛ nà, n ma lwarɪ nɛtu tɛ, n nà mɛ, sà n ya Yu bia tɛ wa. Yu bia tɛntə nà yɪ *Kərisə làa púlí tɛ, ku nà yɪ Yu tɛ, u nà wulə mu wa, nà ti. Kərisə làa púlí tɛntə nà zɪɲa sugu tɛ, ku nà yɪ cígá, ndə yonɪ nà zɪɲa dəyuu nɛtu.

¹⁶ Cígá tɛ, ka nà sègè ku yoo tɛntə wa, ka dèní lù zənzən. Liù mama wàri ku yoo tɛntə, u tútùní. Ku mù nà yɪ Zwezi-Kərisə, u nà jigə ləzwənə. Yu-*Siɲu tɛ biri də, u yɪ cígá tíú Yu yáá con. *Malíkɛ nɪ wá. Làa swìn u sugu tɛ, ba biri luu dwíé tɛ mama nà, Làa kəni ba waa u nà, tia yuu wa. Yu ti wá, u kə u con dun bwálí wa.

4

Kunkun karnyɪna-ba yoo

(1 Zwan 4.1-3, Kolosə tián 2.16-23)

¹ Yu-*Siɲu tɛ cígá swìn də, talíkwa mánjá tɛ wa, làa duən, ba nà ken ba waa Zwezi nà, wá pìi ba yá wá. Ba dān wá pìi ba zìlí *zinə nii, ba ga wá twá tɛ mù zinə tɛ kàrà nii nà. ² Ba wá dugu ba tián ba pa níé bələ tián, ba

nə yi kunkuna, gıgarı ba, ba ga pa ba jén. Ba mù kunkuna təntə pubuŋa tə tıga míámíán, ndə gantwan nə dí mən. ³ Ba mù nə kàrì ba bırı də, ku culi, sə kan də bæ swe duən nə. Ba ga bırı də, ku culi, sə là dɔ wodirən duən də. Tə mù wiən təntə ga yi Yu fwa, sə ba dɔ. Là tə, ba nə ken ba waa Zwezi nə, ba ga yèə cígá tə, ba nə ken Yu lèè, ba ga dɔ tə, ku ba yolwan mama jə. ⁴ Wiən tə mama, Yu nə fwa ziən. Won mama tɛlɔ, ba nə mɛ, sə ba lɪ ba dugu, də ba nə jon tə mama, ba ga kə Yu lèè tə yırı. ⁵ Yu sugu tə də yijunı tə yàá pa won mama ziən, ku pa Yu nə.

Zwezi-Kərisə tutunzəŋu yoo

(2 Timote 2.14-16, 4.1-2, 5)

⁶ N mɛ, sə n kàrì yìèn tə tə, n bırı là tə nə, ba nə yi n nubia Kərisə yırı. Ku nətu wá pa, n ya Zwezi-*Kərisə tutunbiu nəzəŋu. Ku ga wá bırı də, n pın cígá Yu sugu tə nə, n ga twá ku nə zəni. N nə kəni n waa ku nə, də kàrà nəzəŋu tə nə. Yá ku tə bırı də, sùràn tə də kàrà nəywánjú tə saŋa mú, tə pa n vəli yàá wuuu, Yu cwəŋə tə wa. ⁷ Dugu ləyirən yomanan tə, tə nə tà Yu nyiən. ⁸ Də liù nə fwa diàn won, ku yàá pa v yıra ja diàn, ku ga wá san wá mancın mancın. Yá v nə twá Yu cwəŋə tə mù nə zəni, ku mù saŋa wá zənzən ku dwiən. Ku wá pa v na mu nədun síún nə. Ku mu təntə ga wá ya mu tə, ku nə ba zwè Yu con. ⁹ Ku mù sugu təntə yi là tə mama nə mɛ, sə ba sè ku, ba pa ba tiàn nə. ¹⁰ Mə ku mù nə pın, nə ma tuŋa də nə jaŋa. Yá nə ken nə yala Yu tə nə, v nə wulə mu wa. U mù nə pìà, sə v jon là tə mama ba cuna wa. U mù nə wá jon là tə mama, ba nə ken ba waa Zwezi nə,

¹¹ Ku mɛ, sə n pa nii tə yìèn təntə yırı, sə n ga kàrì tə mama n bırı. ¹² Dàn ká sè n pa, ba mun mú, n nə yi ləzwəndun tə yırı. N mɛ, sə n pa ba twá n tətə nə, ba ma lwarı nətu tə, ba nə mɛ, sə ba ya. Ku nətu tə wá twá n sugu nə, də nətu n nə yi nə. Ku wá twá n nə swə là nətu nə, də n nə kəni n waa

Zwezi nə wuuu nətu, də nətu tə, n bican nə yi nəpon Yu yáá con. ¹³ Kàrí Yu sugu tə mánjá mama wuuu, là tə yáá con, də n pin ba kwìè, də n biri ba. Fwa nətu ku jə vələ diun tə, à nə wá bà. ¹⁴ Dàn ká gwièn tarpiun tə, Yu nə pin mú. Yu pin mú tarpiun. Təntə ku twá Yu nii *sùsùnà tə sùràn nə, ba nə swìn n yuu wa. Kərisə là púlí yáá tián tə ga tún ba jìàn n yuu wa ku yiri. ¹⁵ Kə n diàn mama lá, sə n wàní tun ku tutuŋi təntə, n pa ku nii sú. Fin n yíá ku yuu zəni, sə là tə mama na də, n yi n vəli n yáá wuuu, Yu nyiən tə wa. ¹⁶ Cɪ n tián nə, sə n cì ku tə, n nə kàrì tə də nə. Ja pínú wuuu, n dàn ká pìi n kə kwa. Də n nə fwa ku nətu, ku wá pa Yu jon mú n cuna wa, v ga twá mú v jon ba tə, ba nə cuga n sugu tə.

5

Nətu tə, n nə mɛ, sə n ya Kərisə là tə yáá con

(1 Korəntə tián 7.34-35)

¹ N nə wulə də bazunu, v nə fwa yoo, ku nə wà mɛ, dàn ká caga v nii nə də diàn. N mɛ, sə n kwè wá bùàbùà, ndə v yà nə yi n nyina nə. Kwè balandura tə, ndə ba yà nə yi n nubia nə.

² Də kazunu nə fwa yoo, ku nə wà mɛ, sə n kwè wá, ndə ba yà nə yi n ninə nə. Kwè kaninə tə, ndə ba yà nə yi n nakwana nə, n ga pa n bican ya nəpon ba yáá con.

³ Zilí kadənu tə, ba cígá nə yi ba cici, sə n ga ywàń ba yuu. ⁴ Kadənu tə, v nə jə bia, nə à yèé nìán, ba mù nə mɛ, sə ba dí yáá ba ywàń ba diè là tə yuu. Ba mɛ, sə ba tun ku tə, ba nə mɛ, sə ba tun ba pa ba là tə nə, sə ba ma kə ba lèè. Mə yoo təntə nə Yu swə. ⁵ Kadənu don wulə, v nə yi kadənu cígá cígá, v nə wulə v cici, v ga ba liù mama jə, sə v ywàń v yuu. U mù kadənu təntə yáá kə v yala Yu nə. U yáá jùnì Yu titun də yicav, v lòrì, sə Yu san wá. ⁶ Yá kadənu tə mù, v nə fwa v fira cici, də v wulə mu wa tə

mama, v yi ndə v tɪga Yu yáá con. ⁷ Nèñ ku tə n nə mɛ, sə n pa nii ba ku yuu wa, sə yìèn dàn ká ya ba yɪra, lià nə wá caga ba nii nə tə yɪrɪ. ⁸ Də liù nə ba v dwíí tián nə saɲa, nə à yèə ku tə, ku nə dwə, v ba v diè lià tətə nə saɲa, ku tíú vɪga Zwezi. U mù liù təntə waa lɪɲa ku dwən liù tə, v nə wà v waa ken Zwezi nə.

⁹ Dàn ká púpúní kadənu yɪrɪ n súrí kadənə tə nə, á nə saɲa ba nə tə nii nə, də v nə ba bɪna sapwɪtwa jə. Ku súrí lá, də v bari nə wà nədu yɪn.

¹⁰ Kadənu mɛ, sə v ya liù tə, ba nə bwi v tutunzəŋə nə. U mɛ, sə v ya liù tə, v nə ywàń v biá yuu zəni, v ga sè, v joŋə vərə zəni v pa, ba zurɪ v diè wə. U mɛ, sə v ya liù tə, v nə sɪn*fl* lià tə, ba nə yi *Kərisə nə tɪ, nɛɛ. U mɛ, sə v san lià nə, ba nə wulə càn wa, v ga tɪn tutunzəŋə, mánǵá mama. ¹¹ Dàn ká púpúní kadənə tə, ba nə yi kaninə, tə mù yɪra kadənə yɪra sagɪ tə wa. N nə púpúní ba yɪra lá, mánǵá tə wa, bari swiu fɪra nə jə ba, ba wá dugu

Zwezi-Kərisə lá. Yá ba ga va ba swe bari nə. ¹² Ba yà fwa ndə ba twá Zwezi-Kərisə nə, ba ga pɪí ba yá wá. Ku mù nə pɪn, Yu bura tə wá ja ba.

¹³ Ku nə súrí lá, ku wá pa, ba jì yayɪnyɪna, ba twá diè wa ba vɛli. Yá ku ga bá ya ku cɪcɪ. Ba wá ya sɪfarv tián. Lià duən yìèn nə wá pɪí tə jə ba bɪan nə, ba ga wá swɪn sùràn tə, ba nə wà mɛ, sə ba swɪn. ¹⁴ Ku mù nə pɪn, à pìà, sə n yá kadənə tə, ba nə yi kaninə tə, sə ba pɪí ba swe, ba lɪrɪ bia, sə ba ywàń ba diè yuu nə zəni. À ba pìà, sə nə duɲa twá ba nə, ba ma swɪn yokukwɪɪn mama nə yuu wa. ¹⁵ Kadənə duən dí yáá ba dugu Zwezi cwəŋə tə, ba pɪí ba va ba twá *Sɪtana nə. ¹⁶ Kan tə, v nə yi *Kərisə liù, nə jə kadənə v dwíí wa, v mù nə mɛ, sə v san ba. U wà mɛ, sə v pa ba jì Kərisə lià púlí tə yuu zɪlɪ. Kərisə lià púlí tə mɛ, sə ku san kadənə tə nə, ba cíǵá nə ba liù jə míámíán.

(1 Korentə tián 9.7-14)

¹⁷ Á mɛ, sə á pa ŋwíràn dəkurən bələ Kərisə lià púlí yáá tián tə nə, ba nə tuɲa zəni, ba swɪn Yu sugv tə, də ba kàrɪ ku ba bɪrɪ tə, á doni. ¹⁸ Yu sugv tə

swìn, ku wú: «Mánjá tə wa, n nə jə nau, n ma tɔŋa n fuv, ku wà mɛ, sə n vwa ku nii nə, ku dân ká dɔŋi wobɪa tə.» Ku kúò swìn ku sùrí lá, ku wú: «Tùtùnnò mɛ, sə ɔ na ɔ ŋwírán.»

¹⁹ Də liù nə swìn, ɔ ma zɪga Kərisə lià púlí tə yáá tíú tə don nə, dân ká cɔgɔ ku tíú sugɔ, də ba nə wà lià bələ də batwa yí, ba nə zɪga yáá tíú tə nə.

²⁰ Caga lià tə, ba nə tɔŋa cuna tə, nii nə Kərisə lià púlí tə mama yáá con, sə ku pa, fən zu ba duən tə, ba dân ká tun tə yiri.

²¹ À pɪn mú nii ku tə, də Yu də Zwezi-Kərisə də *malɪkɛ tə, ɔ nə kúrí, sə n zílí ku tə, à nə swìn n con, tə nii zəni. Dân ká kúrí ku vàn don n dugɔ. Dân ká kúrí lià tə, n ma tun ku. ²² Dân ká bíbarɪ n tún n jìàn liù yuu wa, sə n pa wá tutɔŋi Kərisə lià púlí tə wa. Də n nə wà n tiàn nə cì, n wá twá n tun cuna tə. Cɪ n tiàn nə, sə n ya liù tə, n bícan nə yɪ nəpon.

²³ N kúò dân ká nyun níá cɪcɪ. N dân nyun diven*f1* mancun mancun, n pùə yayɪgɔ tə, də n yayɪran tə duən tə yiri, sə tə zwè.

²⁴ Lià duən cuna ba sègè míámíán. Də ba nə swə, ba wà ku tiàn bura bùrì də. Ba duən cuna yɪ ba bura tə bùrì kwa nə, nə ba dân yáá na tə.

²⁵ Tutunzəŋə tə də ba sègè míámíán. Yá tutunzəŋə tə, nə wàrì tə nɪ yii wa, də tətə wàrì tə sègè, tə mɛ lá.

6

(Efɛzə tiàn 6.5-8, 1 Piyerə 2.18-20)

¹ Lià tə mama, ba nə yɪ ywəŋə, mɛ, sə ba zílí ba liù tə, ɔ nə yè ba zənzən, sə ku pa liù mama dân ká twɪn Yu, ɔ dân ká swìn yolwan nə kàrà tə yuu wa. ² Ywəŋə tə, ba tiàn nə yɪ *Kərisə lià tə, ba wà mɛ, sə ba mun ba, ba mù də ba nə yɪ Kərisə lià tə yiri. Ywəŋə təntə dân mɛ, sə ba kwen ba tun ba pa ba tiàn təntə nə, ba doni ba dí yáá tə. Lià təntə, ywəŋə tə nə tɔŋa ba pɪn ba də yɪ ba nubɪa Kərisə yiri, Yu ga swə ba.

Kunkun kàrì tə, də cígá cígá jujə tə yoo

(Romə tián 16.17-18, Ebərə-ba 13.5)

³ Nə́n, ku tə n nə mɛ, sə n kàrì, sə n kwè lià tə. Liù don wulə, v nə kàrì kàrà yiri don. U mù liù təntə wà cígá pɪn nə *Yuu-Tiu Zwezi-*Kərisə cígá sùràn tə nə, v ga wà cígá pɪn nə kàrà tə nə, ka nə bɪrɪ Yu nə swə, sə liù ya nətu. ⁴ Ku tíú yɪ fwíə nə jə wá, v ga yəri won mama. U yənu nə yɪ tútùná, v ma dɪ jara yìèn yɪra boŋu yuu wa. Tə mù nə yàá pa v zɪga lià duən nə, ku tián wiən yɪrɪ. U jə tútùná, v də tɪjaŋa lià dè́n nə, v ga buŋa yolwan v pɪn lià nə. ⁵ Ba yàá dɪ tútùná wuuu ba pwérə wa, ba pubuŋa tə ba zìən, ba ga kùb yəri cígá tə. Ba pubuŋa wa nə, ba buŋa də, ba nə twá cwəŋə tə nə zəni, ba wá na səbɪa. ⁶ Ku yɪ cígá də, liù nə twá Yu cwəŋə tə nə zəni, v yɪ jujə tíú, də v nə poli v pùé də ku tə, v nə jə. ⁷ Nə wà won mama ja bà luv wa, nə ga bá wàní won mama nə ja vìí. ⁸ Ku mù nə pɪn, nə nə na nə nii wodiu, nə ga jə ganan, nə mɛ, sə nə pa, tə cɪcɪ mɛ nəba. ⁹ Lià tə, ba nə pìà, sə ba na wiən zənzən, ba yàá pa *Sítana yigu ba, v kə yìèn wa, ndə ba nə zua nyali wa. Ku dàń yàá pa ba sóní wokukwɪnan tə, tə nə cùgà lià tə. Yá tə mù nə yàá cùgù ba míámíán. ¹⁰ Yokukwɪnan yiri mama dəkúu nə yɪ ka sóní səbiu. Lià duən lɪ ba tián Zwezi cwəŋə tə wa, ba pìà səbɪa zənzən. Ba dí càn zənzən ku yoo təntə yɪrɪ, ku ga yɪ ba tətə nə pìà tə, ba pa ba tián nə.

Sagɪ tə yígúré sùràn

(2 Timote 2.3-7, 4.7-8)

¹¹ N mù liù tə, n nə yɪ Yu liù, lɪ n tián tə mù yìèn tə mama wa. Kə n dián mama, sə n wàní n tun ku tə nə yɪ cígá yìèn. Twá Yu cwəŋə tə nə zəni, sə n kə n waa Zwezi nə, mánjá mama wuuu. Sóní lià tə, sə n ja pínú, sə n ja pubwanu. ¹² Púrí n yɪra, n kə n waa Zwezi nə wuuu. Kə dián, sə n wàní n ya mu tə wa, ku nə ba zwè Yu con. Mə ku mù yɪrɪ nə, Yu kúrí mú. Mánjá tə, Yu nə kúrí mú, n tətə swìn cígá sugu lià kapupu yáá con də, n ken n

waa Zwezi nə. ¹³ Zwezi-**Kərisə* tətə dūn zīgɪ, ʋ swìn cígá sɔgɔ tə **Pilatə* yáá con, ʋ ga bɪɾɪ də, ʋ m̀wulə cígá cwəŋə wa. À dān pɪn mú nii ku tə, də Yu tə, ʋ nə pɪn mu won mama nə, də ʋ m̀wulə Zwezi-Kərisə. ¹⁴ Twá à s̀r̀r̀n tə nii nə, à nə dí yáá à swìn n con. Dān ká dwá tə nii nə, dān ká fwa won tə, lià nə wá swìn, ba zīgɪ n nə ku yɪɾɪ. Ya nətu ku ja vələ, nə **Yuu-Tiu* Zwezi-Kərisə nə wá p̄iɪ ʋ bà. ¹⁵ Yu tə, ʋ nə yɪ pupwən tíú, lɪ mánjá ʋ tún, sə ʋ pa Zwezi-Kərisə p̄iɪ ʋ bà ka wa. U m̀ Yu nə yɪ diàn mama Yuu-Tiu. U m̀ nə ya p̄égá tə mama p̄iú, ʋ ga yɪ yun tián tə mama Yuu-Tiu. ¹⁶ U m̀ Yu cici nə wulə mánjá mama wuuu, ʋ ba ti. U wulə poni wa, liù mama nə wàɾɪ ku poni tə yɪra ʋ boli. Liù mama yii tə wà ʋ m̀ Yu ni. Liù ga wàɾɪ wá n ni də. U m̄, sə ba bu ʋ nə, ʋ m̀ nə jə diàn, tə nə ba zwè abada. Amuna!

Nətu n nə m̄, sə n kwè jɪjə tián tə

(Likə 12.15-21, 2 Timote 1.14)

¹⁷ Pa nii lià tə nə, ba nə yɪ s̀ún luv ku tə jɪjə tián, sə ba dān ká fwa fwə. Ba dān ká kə ba waa luv jɪjə wa, ka nə wá lɛ s̀ún s̀ún. Ba m̄, sə ba kə ba waa Yu nə. U m̀ nə pɪn won mama búɾɪ nəba, sə nə jw̄. ¹⁸ Swìn ba con, sə ba tun zəni, sə ba jɪjə tə ya tutunzəŋə jɪjə. Ba m̄, sə ba pa wiən lià nə də ba bɪcɪnɪ mama, sə ba tarɪ ba jɪjə tə də lià duən. ¹⁹ Də ba nə fwa nətu, ba wiən tə, tə kwənə nə dáá, tə də wá ya jɪjə nəzəŋu Yu con, ka nə wàɾɪ ka cùgà. Yá ba dān wá na mu tə, ku nə yɪ cígá, Yu con.

²⁰ À bìú Timote, yw̄ɪn ku tə, Yu nə pɪn mú, yuu zəni. Ja n tián, dān ká dɪ tútúná tə, tə nə yɪ tutu, tə nə tà Yu nyiən. Dān ká kə n nii yìèn tə wa, ba nə wú, də tə yɪ yənu yìèn, tə ga yɪ kunkun yìèn. ²¹ Lià duən yà bún də, ba jə ku yənu təntə. Ku m̀ nə pɪn, ku tián kùù ba ba waa kəni ku tə nə, nə nə ken nə waa ku nə.

Yu nə wá fwa pubwanɔ á yɪra.